

405 *

*Electi tre sopra le fabriche di Rialto
di qual solum do passoe.*

- Sier Alvixe Pasqualigo, fo Cao dil Consejo di X, qu. sier Filippo.
 Sier Nicolò Zorzi, è di Pregadi, qu. sier Bernardo da San Moisè.
 Sier Fantin Zorzi, è di Pregadi, qu. sier Antonio da San Salvador.
 Sier Valerio Marzelo, è di Pregadi, qu. sier Antonio el cavalier.
 Sièr Andrea Contarini, è di la Zonta, qu. sier Ambruoso.
 Sier Polo Nani, è di Pregadi, qu. sier Giacomo.
 † Sier Carlo Contarini, fo provedador al sal, qu. sier Batista.
 Sier Nicolò Vendramin, fo podestà e capitano a Treviso, qu. sier Polo qu. Serenissimo.
 Sier Zuan Antonio Dandolo, è di Pregadi, qu. sier Francesco.
 Sier Francesco Foscari, fo Cao dil Consejo di X, qu. sier Nicolò.
 Sier Faustin Barbo, fo avogador di Comun, qu. sier Marco.
 Sier Agustin Venier, fo di Pregadi, qu. sier Marco.
 Sier Marin da Molin, è di Pregadi, qu. sier Jacomo.
 † Sièr Moisè Venier, fo al luogo di Procurator, qu. sier Moisè.
 Sier Zuan Dolfin, è di Pregadi, qu. sier Daniel.
 Sier Daniel Dandolo, è di la Zonta, qu. sier Andrea.
 Non. Sier Francesco di Garzoni, fo consier, qu. sier Marin procurator.
 Non. Sier Zuan Antonio Barbaro, fo capitano e provedador a Napoli di Romania, qu. sier Josafat.
 Non. Sier Francesco Longo, fo provedador al sal, qu. sier
 Non. Sier Domenego Contarini, fo podestà a Chioza, qu. sier Bertuzzi.
 Non. Sier Piero Mudazo, è di X Savi, qu. sier Marco.

A dì 29, Domenega. La matina, in Colegio, vene sier Francesco da ca' Taiapiera venuto conte e capitano di Sibinico, in loco del qual è andato sier Alvixe Pizamano, et referì di quelle ocorentie. Fo laudato dal Príncipe justa il solito.

Notò. In questi zorni vene letere, sier Nicolò Michiel qu. sier Alvixe conte di Traù era morto, et la Signoria elexe viceconte in loco suo sier Zuan Zane castelan li a Trau.

Si ave aviso per via di Fiorenza, per *letere di 21 Avosto acusano aver di 28 Zugno da Constantinopoli*: il Signor turco era zonto de li; *tamen* in la Signoria non è alcun aviso, dil 20 Zugno ch'è letere dil Bailo nostro in qua, che a tutti par di novo, et desiderano saper qualcosa.

Da poi disnar, fo Gran Consejo. Fato consier di Dorsoduro in luogo di sier Piero Marzelo acetò capitano a Verona, qual era a la banca e non ense justa la parte fin non è fato in loco suo, e rimase sier Sebastian Justinian el cavalier è ambasador al serenissimo re d' Ingaltera. Patron a l'Arsenal, in luogo di sier Giacomo Bragadin à refudado, sier Hironimo da Canal, fo capitano di le galie di Alexandria, di sier Bernardin. Do dil Consejo di X, sier Hironimo da ca' da Pexaro, fo consier, qu. sier Beneto procurator, et sier Marin Zorzi et dottor, fo Cao dil Consejo di X, da sier Francesco di Garzoni, fo consier, qu. sier Marin procurator, il qual fo stridà esser debitor; ma non havendo auto li 8 zorni di tempo, poi mandato al palazzo per l'oficio di Avogadori extraordinari, lui che era in eletion vene con soi parenti a la Signoria, mostrò le leze, *maxime* una del 1484 a di . . . che par dagi termine a li debitori 8 zorni poi mandati i libri a palazzo perchè, *vel bene vel male* pasati, non sarano provati. Or la Signoria terminò si 406 potesse provar: et balotato cazete. Fu fato 6 di Pregadi vechii, et cazete tra i altri e fu sotto 5 balote sier Almorò Donado, fo podestà a Padoa, qu. sier Piero, e fo ultimo balotado, qual è stato consier e podestà a Padoa per danari, e a Padoa si ha portà ben, ha pastizà a tutti i zentilhomeni capitava a Padoa, et va ancora in Pregadi per danari, et in questa guera ha prestà ducati assa', *tamen* è cazudo.

Fu posto, per li Consieri e Cai di XL, essendo rimasto ozi Consier di Dorsoduro sier Sebastian Justinian el cavalier è ambasador al serenissimo re di Anglia a servicii publici senza salario, però li sia risolvà la conseiaria a intrar 3 zorni poi sarà zonto in questa terra, comè ad altri in simel casi è stà concesso. Fu presa: ave 1047, 160, 2.

A dì 30. La matina, in Colegio, fo letere dil duca Lorenzo fradelo dil re di Ongaria, richiede a la Signoria vol far canonizar il corpo dil bia' Zane di Capistrano, qual fa molti miracoli etc.; et la copia di la dita letera sarà scritta qui avanti.

Da poi disnar, fo Consejo di X con la Zonta.